

EKOMUNYAWU

☛ . . . Apwiya. Ni vekeekhai ninnoona othunku saana hiyo ohikhalana ikhatera wira naavahe opuro atthu, ni w'ale a—ansuselihiwa, vate. Kinoomalaru wiiwa, okathi vakhani ovinre, weiwo naakhanlyaaahu okhalanaka nipuro na eteyaaturu oNew Albany, khino naarowaahu okhala oowaakhapelela atthu oophiyaka imiya tthaaru. Masi hiyo naari paahi . . . Muhakalaliho waari paahi wa nikhuru naamukhaani va mukereja. Ni—ni hiyo nirina okathi vakhani paahi varwiiyaahu owaani. Ni hiyo ninnitthapa vanci-ene owoonani nyuwo othene.

² Kaahivonye vale, kinnimoona munn'aka a oGeorgia va. Munna, nkinwerya wuupuwela nsina nanyu naanaano va; Palmer, a oMacon, Georgia. Ninnitteeliwa murima okhala ni nyuwo va, Munna Palmer.

Munna Creech, va ohoolo, hiyo ninnitteeliwa murima owoonani.

³ Ni koosuwela wira nipuro nimosa mpaani mu ookhala Totori Lee Vayle, mmosa w'anamakhaliherya a mu—a muthukumano oLima, Ohio, weiwo va . . . Owo ti pastore a ekereja Patista Yoopacerya, ni m—mpatthani aka a omeekha. Owo aari owaani olelo, ni orweenle onithotola wiiraneyaka muthukumano. Hiyo alakela, ohiyu umosa, hiyo ninoomwiitthana wira ovenye ni ahimye etthu. Miyo koophavela omwiiriha owo okuxa opuro aka ohiy'ula, wira alaleye, vano owo khukhootta. Vano hiyo ninniroromela, khino, wira khino meelo ohiyu, wala okathi mukina, Munna Vayle wala akina wa a . . . anoowerya ohimya nuulumo nimosa wala manli, enihimya khino muthukumano wala etthu iwe, etthu p'itthu Apwiya anihel'aya mmurimani mwawe.

⁴ Aakhala akina va kaatthun'aka wira kiwerye okuxa okathi wo waaxukhurela othene aya, masi nootteeliwa murima mwaha wa nyuwo okhala va. Kinnimoona mwaapara mmosa mwaamukhaani ottuli iwe, yoowo okhanle nikhuru na arumeyi anrwa, yaakithotola oxekuw'ola, anikhuma wArkansas ni tho ankhuma oMissouri.

⁵ Nto vano, ohiy'ula, ninthuna nuurele okathi, okhala wira khula ohiyu ninrowa ophavela omaliha ewoora ya neethanu na xexe, vaweryaneya vale. Ohiy'ula ohiyu wa ekomunyawu, vano enoorowa opisa vakhani ohiy'ula ovikana valimaleliwaaya.

⁶ Meelo ohiyu, Apwiya yatthuna vale, kintthuna kilaleerye: *Mukhale Ooloka Voomalela ni Mukuttho Wooloka Voomalela*, meelo ohiyu. Vano, nto, eyo Namathanu Yoowaarya.

⁷ Vano nto Saapatu ohiyu ti *Ovithiwa*, Apwiya yatthuna vale.

8 Ttiminku voosiisu, muteko wa Nsuwa niphattuwaka ewoora ya neethanu na mosa. Ni ewoora ya namuloko, muteko w’opatiiso. Nto ewoora yanamuloko ni minuutu miloko miraru, nisomi na exikola ya Ttiminku, na ohihimuwa.

9 Nto Ttiminku ohiyu, muteko wo ovoniha voolimaleleya ntoko sinkhalanaahu mma—mmapuwani wo olaleya ehapari yooreera.

10 Tivo, vano hiyo ninniroromela wira munimwaakuxa apatthani anatampi, ni siiso, nto murwe mukhale ni hiyo, ni munikhaliherye mwa muthukuman’ola onoorwa...okelela ohoolo wa muthukuman’ola, kiireke.

11 Kirina Bibilia musya, ohiy’ula, kivahiwaaka ni mutthu, munna mmosa a Dunkard. Ni etthu yuulupale. Emaara yoopacerya onlaleyaaka-no. T’ohilimaleleya vakhani wa miyo.

12 Vano, koosuwela wira nikumanne mwaha wa etthunelo emosa, ekhanle, o—orowana ottaiwene niwoko na Kristu, ni ophwanya murettele mmunepani mwahu, ni onikhaliha alopwana ni athiyana ooloka, arumeyi ooloka a Apwiya. Nto vakhala wira nirweenle muupuwelo mukina, vano, nto khaninrowa okhala ooreerhiwa a Apwiya. Hiyo nirweenle okhaliheriwa. Nirwiiye, ninwehaka Muluku. Ni ela empa y’ottharuxiwa-mo, vaavo Muluku onnivahaawe iparakhha Sawe, ni onittharuxa soonanara.

Vano nihinatthi okhunla Masu, ahiiso—ahiiso ovekela Erooho Yoowaarya wira enikhaliherye, nrowe nuurame muru.

13 Tithi a Wirimu Oottotopeliwa, ohoolo wa Mukhalelo Anyu w’eMuluku hiyo ninniisooniherya ni, ntoko alipa-oowiiwa Ehapari yooreera, vano ntoko alipa-oolavula Masu; mulyihe masoma iyano sinlavula, ni maaru aniiwa, ni mirima sinaakhela. Ni wira Erooho Yoowaarya enikawele, ohiy’ula, ni envahe Ikeekhai sa mahala a Muluku Ahinimala, wa khula mmosa a hiyo; wira, hiyo nakhuma mpaani mu, ohiy’ula, nihimye ntoko ale yaakhuma Emawusi, “Mirima sahu khisaaniviha, okhala wira Owo aalavula ni hiyo mphironi?” Maana hiyo ninvekela mwa Nsina na Yesu. Amen.

14 Muliivuruni mwa Ehapari yooreera ya Matewu Oowaarya, kapiitulu 26, versiikulu 27 ni 28, wa yoosoma kintthun’aka osoma.

Siiso-tho owo aahikuxa ekahi ya eviinyu, nto numala khuxukhuru, khwaavaha, khwira, Nwuryeke ela othene anyu;

Tthiri ela ephome aka ya waataana wa naanaano, emmwaraxeliwa atthu anci-ene wira eleveleliwe etampi.

Masi kinoolelani wira, okhuma olelo nkinwurya-tho eviinyu ila, mpakha nihiku ninrowaaka owurya esya ni nyuwo moomweneni mw'Atithi aka.

¹⁵ Nto vano ninrowa olavula mwaha wa: *Ekomunyawu*. Ni ola ohiyu w'ekeekhai wa *Ekomunyawu*.

¹⁶ Nto *ekomunyawu* yaairiwe, voopacerya, wEjitu, *ekomunyawu* yoopacerya, yoowo aari mwa—mwaapwittipwitthi a paasikha aaviwe, yoowo aari ethoonyeryo ya Kristu. Ni anci-ene a hiyo noolimalela ehantisi iyo yoottotopeleliwa ya khalayi, ya moota ale yaakhenle *ekomunyawu* iwe, yeettalyaaya eviraka mothakoni mwa miyaakha miloko mixexe. Nto okathi akhumans'aya, khaakhanle hata mmosa otteettheya eriyari aya. Ni iwe, hata ikuwo saya khisaattukuttheiye, mwa miyaakha miloko mixexe *Muluku* aakhapelenlyaawe.

Nroromelo xeeni woottotopeliwa wa hiyo ohiy'ula! Eyo yakhala ethoonyeryo, vano Kristu ti mooniheryo. Ni moota *Muluku* aavulunxaawe aana!

¹⁷ Ni, mwa waakhela *ekomunyawu*, yaari evirikanelo y'ekumi ni okhwa. Ale yaari muhina, vathi v'ephome yoomwaraxiwa, yaahaakhela *ekomunyawu*. Khaavo hata mmosa aakhanle waakhelaka *ekomunyawu* ohikhanle vathi v'ephome yoomwaraxiwa. Ephome ya mwaapwittipwitthi yaahimwaraxiwa toko, vano nto khuheliwa vasulu ni ipantte sa mukhora. . . vasulu va mukhora mwiikimanyo wa ethaapwa, ni ipantte sa mukhora. Vano nto mwaapwittipwitthi aakhala oowoowiwa, ni aari. . .ni—ni aakhuuriwa ni malaxi oowaawa, ni yaaniitthukela musako. Nuumala ephome omwaraxiwa, ni yaahivira vathi va ephome yoomwaraxiwa, awo yaahiitthukela musako ni yaahilikana wira yeete.

¹⁸ Nto vano eyo ethoonyeryo yooreera saana ohiy'ula, ya, athu anaakhela *Ekomunyawu* ehikhaleke oopatthana wala wiitakanxa-tho ni itthu sa molumwenkuni. Awo ahaana orwa vathi v'Ephome toko, ni okhala ookukutthiwa itampi sothene, yeeyo okhanle ohaamini, vano nto owarihiwa ixapattho so wiilikanyiherya Ehapari yooreera, ewaraka ikaruma sothene sa *Muluku*, oolikanela wiitthaniwa wa khula okathi.

¹⁹ Ni yaari e—ethoonyeryo wira nlaikha na mookhwaani khinaakhanle okelaka vathi v'ephome ele. Nlaikha na mookhwaani naahaana ovenya ni ovira vasulu v'ephome. Nto ti vaavo mulipa-olepa ophwannyaawe muupuxeryo, airaka, “Miyoo koonaru Ephome, kinoovira vasulu vanyu.”

Waahikhuveela okathi w'ovuluxiwa okathi awo akupanlyaaya *ekomunyawu*, mwa—mwaapwittipwitthi oowoowiwa ni ma—malaxi awo yaakunxe-aya ehinatthi okhuma.

²⁰ Vano, mwa mooniheryo hiyo nryaahu wira nilavule, saari miyaakha sinci-ene khalayi, ohiy'ula, Yesu aalyiyaawe ele

ensuwel'ahu ntoko Olya w'Apwiya, Ekomunyawu. Ni yookhala etthu wa yeeyo, wira, Owo aarowa olavula n'awiixutti Awe. Ni okathi vakhani ohinatthi orowa, Owo aatthuna olavula yeeyo ni yaawo. Ni eyo e... Awo yaahikhalana nipuro naatthokihawe. Waari okathi wo opatthana. Nto *ekomunyawu* enihimya "opatthana."

²¹ Ikereja sinci-ene sirina Ekomunyawu yoowaliwa, eyo ti wii, ya ekereja aya paahi okathi ankhhalanaaya Ekomunyawu aya, masi va hiyo khanihiyo muromolelo, hiyo nirina Ekomunyawu yoothukuliwa wa othene, maana hiyo ninnaamini wira khula mulipa-oowaamini ookhalana ehaakhi ya vameesa v'Apwiya, ni opatthana mwa itthu sooreera sa Muluku, ni khula mulipa-oowaamini, voochicala eyaaminelo, nikhuli, wala etthu p'itthu owo okhanlyaawe, maana othene aakhalihiwa oowurya ya eparakha emosaru, Kristu.

²² Vano, okathi ula muulupale waahimwaattamela Pwiya'ahu, mmosa wa okathi wootepaxa wehereriwa wa mweettelo Awe wothene elapo ya vathi waari vakhiviru. Okathi wo wehereriwa! Yesu aahaana ovira mowehereriwani, siiso hiyo onviraahu mowehereriwani. Ni Bibilia ohimnye wira, "Khula mwaana onrwa wa Muluku, ohaana toko wehereriwa, oxuttihiwa, ottharuxiwa."

²³ Vano, atthu anci-ene, eyo ti eyooniheryo okathi wo wehereriwa onrwaaya. Ola okathi wa nipuro no wooniherya. Ni Bibilia ohimnye wira, "Hiyo naahiweryeke ovilela wehereriwa, weeso ninkhala aana oohiphwanela," hiyo ninihimya Muluku okhala Tith'ihu, vano nto Owo kahiyo Tith'ihu. Tthiri vakhala wira hiyo voolikana-ene, ni ni murim'ahu wothene, noomwaakhela Pwiya Yesu okhala Moopoli ahu, khiivo hat'etthu elapo ela ya vathi wala mwa ehimalelo yothene yooripela enwerya—enwerya okhalakhala enimwalanihaka n'uphenta wa Muluku ori mwa Kristu Yesu.

²⁴ Miyo kinnitikinihiwa olelo, ni kweekwe kinnikhalaka atthu yaahimya okhala aKristu, ni, wehereriwa vakhani woopacerya onrwa, awo anoomora eriyari y'ephiro. Eyo onoorowa wooniherya wira owo waari muupuwelo w'otthokelela mwaha wa Kristu. Mwaha wa yeeyo anci-ene ahinwery'aya ovilela olelo, okhala wira owo muupuwelo w'otthokelela. Vootthokelela, mwaamuwerya waamini Yeeyo, masi Eyo enrowa voovikana yeeyo. Omukupali Kristu, onkhala okupali oMutthu wa Kristu.

²⁵ Anci-ene a hiyo ninaakhela etiini y'oKristu mwa wiixutta eyaaminelo. Mukina onikupali oKristu vasulu va miixuttiho s'opatiiso. Akina anaamini wira aKristu mwaha wa eyuukhuwelo emosa awo apakalyaaya, ntoko okhuwela, wala wiina mwa Erooho, wala olavula ilavulelo, wala okhalana yoovaha yooreeraxa yo wooniherya. Itthu iyo sothene ti sooreera

voopuroni vaya. Masi, omukupali Kristu, onkhala okupali oMutthu wa Kristu, vano nto itthu iya sikina sinoomorela muliinyani paahi mmansaya.

²⁶ Vano, vakhala wira Muluku khomwiinanenle Mwan’Awe wa wehereriwa wootakhala, vano Owo khonrowa owiinanelani nyuwo wala miyo wehereriwa wootakhala.

²⁷ Ni Yesu aari muumu owananaka wehereriwa wuulupalexa Owo otonko awe okhalana, Ketisimane aaphwanyaneya ohoolo Wawe, weiwo wehereriwa iwe omosa wookiserya woomalela wothene waarinaaya orwa, [Nipuro vahiitthu mufiitani—Mol.] okathi miritti sa mulaponi mothene saaheliwaaya vanikhatani Vawe vooreerhiwa. Khaakhanle hata mmosa Wirimu wothene wala elapo ya vathi aarowa okhalakhala oweriyaka ovilela woohikhala Yoowo. Ni osuwela wira itampi sothene, sa itampi sivinre, itampi sa vano, ni itampi s’ohoolo, saakhala vasulu va ethanlelo yeela. Ni waari omosa wa oxintta wuulupalexa Kristu otonko awe oxintta, wala oonihenryaawe oMesiya Awe wuulupale, ntoko okathi Owo omuhimenry’awe Muluku, “Kahi otthuna Waka; Wawinyu wiireye.” Iwo waari oxintta wuulupalexa Owo otonko awe oxintta. Axetwani othene a moohaaxani yaahimurukurerya wira emutthattehe ni emwehererye Yoowo.

²⁸ Nto hiyo nakhalaru oratta-ene ni Muluku, mirima sahu sakhala sooloka, ni Erooho Yoowaarya khukuxa opuro Aya mmurimani mwahu, eyo t’itthu yoovuwexa okhalana wehereriwa. Bibilia onnihimeerya wira, “Wehereriwa wahu ni weereriwa ti sooreeraxa wa hiyo ovikana eparatha ni eweero ya olumwenk’ula.” Tivo, hiyo nri, naahaana okhala ooxukhuru.

²⁹ Miyo nkinthuna wiiruuha mmansaka mwa musuwelelo mmosa, masi siiso ntoko enrwaaya mmuruni mwaka, kinnuupuwela wehereriwa wuulupale ni wookiserya kaarinaaka mwa musuwelelo aka w’eKristu, waari wu oxipiritali nno oSpring Hill. Okathi, amwaar’aka yaataleleiyeye aya mpaani mwa anamukhwa wenno nno, murutthu, nto awo yaammalaru okhuma mw’ekumi ila, wira yakhale ni Muluku. Ni wehereriwa ni weereriwa waahipacerya! Kahi mutthu paahi airaka, “Billy, nyuwo mwa santu oophirikeya.” Wala, iwo khiwaari wehereriwa vanci-ene. Ni wehereriwa nno okina vakhani, ni sikina, wo wuulumeliwa n’atthu kinvaraaka-no muteko, khiwaari wehereriwa wunci-ene. Masi okathi aka muulupale wo wehereriwa waarwiye okathi tothoro, Adair (kaamootolenyaaka yoowo nsana oxipiritali okathi waakilaanthe ahu vamosa), vano varwiiyaawe musaala okumana ni miyo, khukivara ntata, khwira, “Billy, mwan’inyu onimookhwa, ni khiivo enamuna ya owo okhala mukumi. Orina menixiiti ya elapaha.”

Miyo khwira, “Vekeekhai nnari, tothoro!” Nto ame awe arimwaataleliwa, murutthu!

³⁰ Nto miyo kaanvolowa. Vano owo khwira, “Murwe ni miyo paahi.” Vano hiyo khurowa mpakha olaporatooriyu, vano weiwo owo khuttotta mpompe mukhaani wa eviituru, vano owo khutatha. Ni yaakhala ntoko naari nlepa memmo. Owo khwira, “Ele eropo ya menixiite ni eri mwa ttutthu. Hiyo nikuminhe ela mmuthanani, wira nikumihe othukumelasa.” Nto owo khwira, “Mwa yeela, hiyo ninnoona wira eyo menixiiti ya elapaha.” Khwira, “Orimwaamwa mw’ame awe.” Ni khwira, “Mwaan’ole aakhanleru mukumi, aamukhala oorakala, ookattiyamiheya. Masi,” owo iirale, “mwa omoriwa ikharari wa Muluku, mwaana onrowa okhala n’ame awe.”

Miyo khwira, “Tothoro, kintthuna kimoone mwaana.”

Owo khwira, “Muhiire siiso, Billy, mwaha wa Billy Paul, mmiravo anyu.” Khwira, “Mwaamukuxa eropo mmuttikiherye yoowo.”

³¹ Ni, nuumala ophavela okilipiherya vooreera saasuwelaawe, vakhumalyaawe mpaani, miyo khuthereneya khurowa vathi mporawuni. Nto vaphiyaly’aka mmwe, exipiritali okathi ule khiyaakhalihwe ntoko eryaaya vano, nto ecanela yaahihuliwa ni reeti aari vate, vano iphepele kamosa-kamosa saahikela mmaithoni mwa mwaamukhaani. Vano miyo koomola iphepele khuweha erutthu awe yaamukhaani, yookhume-ene, ni metto sawe sikhaani sittikinyeyaka ohoolo ni utuli. Vano miyo khumwiirela, “Sharry, oophentiwa, munnaasuwela apaapa?”

³² Nto yaakhala ntoko wira owo aathuna okittikinyela ntata nawe naamukhaani; a miyeeri soophiyaka mithanu na miraru wala mithanu na mixexe. Nto miyo khunweha. Vano owo khaareere ohaawa, mwaana mwaamukhaani oohittheke, mpakha nimoso wa maitho awe makhaani a mwaana ooripelela ovirikana. Owereya vanci-ene! Oh, kaamwiira kikuxale-ene khula okathi, voopuroni vawe.

³³ Vano miyo kikokhora, ni mikhora soowaliwa, nto miyo khwira, “O Muluku, Tithi, vale amphwanyaneya amwaar’aka, ame awe mwaana yaataleliwe iwe empa y’alipa-oosikha. Vale ori Billy Paul voolilini, owereiwaka. Nto wa ori ttutthu aka, onookhwa. Nyuwo vekeekhai, Pwiya, khamunrowa omukuxa. Miyo kinnimpenta. Ni owo aalantte ame awe. Kintthuna kimulele. Khamunrowa Nyuwo xontte, O Muluku, wiinanela ekumi ya mwan’aka?”

³⁴ Nto okathi waawehaaka osulu... Ni ntoko nyuwo othene sinsuwelaanyu, miyo kweekwe kinnikhalanaka soowoona. Waakhala ntoko mukhumi wooriipa waapacenrye otaphuwa, okhuruwaka, ni ntoko wira Muluku aarookuxa mavekelo aka khukirihelela wiitho waka. Nto miyo khwira, “Kinreni miyo, Muluku? Kiroohonona ikano Sanyu, wira kihaana waakhela

ehukhumu yeela? Vakhala siiso, Nyuwo muupulule paahi, nto miyo kinoorukunxa murima. Miyo kinimwiira khula etthu, masi muhimukuxe mwan'aka." Nto kaahoonu wira aamurora, khula enamuna. Miyo khuyenya.

³⁵ Vano nto namatthehattheha khukirweela. Waahikhala okathi mmosa mwa ekumi aka yothene, kikhanlyaaka wiihanaka, waari okathi wootthuneyaxa, Ketisimani aka. Okathi waavarelelaaka olili voohiloka, xetwani khwira, "Nyuwo vo. Eyo ti etthuvulo yo ophavela omurumeela Yoowo. Nyuwo munthuna ohimya wira Owo onoomukuxa mai ule a miyaakha miloko miili, ni omwaatalela iwe ntoko murutthu mpaani mw'alipa-oohkwa? Ni onoorwa omukuxa mwaana ooreeraxa, erutthu anyu yeenyu ni ephome? Omana mavekelo anyu wiitho wanyu? Vano nto nyuwo munthuna ohimya wira munrowa omurumeela Yoowo?"

³⁶ Miyo kaaphwanyaneya eriyari ya muupuwelo. Yaahaana othanliwa. Vano miyo khumpweherya ntata naka vamuru vawe mwaamukhaani, miyo khwira, "Apwiya ti yaakivanhe, vano Apwiya t'amukunxe, nittotopeliwe Nsina n'Apwiya!" Miyo kaahoonu okhurunuwa murima.

³⁷ Miyo khwira, "Sharry, oophentiwa, Apaapa khanwerya orowa ory'anyu vano, masi Apaapa animoorwa nihiku nlo. Miyo kinoowaatalelani mmoonononi mwa Amaama, ni koovitheni, masi Apaapa anoowoonani-tho nihiku nlo."

³⁸ Mwenye Isler, yoowo khino okilaanthe vaava naanaano (nkinwerya woona vamuttitthini), mukhulupale a estaatu a khalayi nno a oIndiana. Miyo kaarowa rampha muulupale. Mwenye Isler, kinoona wira munoowerya wuupuwela saana.

³⁹ Kaahenle matata aka ottuli waka, kirowaka vamahiye, emalakarū osarya maasi, kinlaka. Kaanirowaka weiwo ohiyu. Nsiya nimosa naamukatela mmwirini, ni okiipela miyo. Yaakhala ntoko mwa oriirya wa ipinyeero iye ni miri, yaakhala ntoko nsipo naaruma voomaaleleya mwemme, niiraka:

Wookhala Muttethe okhopela wa muro,
 Nniihanaahu woosivela voohimala,
 Nimphiya ekhopela ele ni waamini paahi;
 Mmosa mmosa ninoophiya vamukhora,
 Iwe nakhale ni oohikhwa,
 Nihiku nlo awo anoorumiha ittiwi iye sa
 eweero wa nyuwo ni miyo.

⁴⁰ Mwenye Isler, eettihaka ekamiyawu awe ya khalayi, khutuphela ota, ni khukipweherya moonu awe. Owo khwira, "Miyo kinniwiwakani mulaleyaka munloothoni mwa ephiro, Billy; Miyo kinniwoonakani mweemenle mutapernakulu; Miyo koowiiwani munsiponi mwiipaka; moota mwaamuttotopelaanyu Kristu, ele muhimaly'anyu wira Owo t'aaryaawe!" Khwira, "Vano Owo ohaakuxa atith'inyu, muhima

anyu, amwaar'inyu ni mwan'inyu." Khwira, "Vano Owo onihimya-ni wa nyuwo?"

⁴¹ Miyo khwira, "Mwenye Isler, vaakhanle wira Owo aamukiroiha mapuro a ale oopweteya, miyo nlelo kaamumphenta! Maana, nihiku nimosi, ohitto wu munipantthani na khalayi na makhala, yahikhumelela etthu vathi va mmurimani mwaka, yeeyo ehikhanle hat'etthu enwerya ottikittha-vo. Khiyaari hat'etthu miyo kiiraly'aka. Yaari mahala a Muluku Ahinimala yaakivarelenle okathi wa ethanlelo yuulupale!"

⁴² Nto okathi Pwiy'ahu oottotopeliwa, oKetisimani, okathi waarowaawe weiwo, okathi Owo aary'awe mu-. . .wira okhootiwe oYerusalemu, ni mwaataano wa makhulupale waarowaaya okumiha ekumi Awe, okathi ekiseryo Ehinimala ya khula munepa, waatonko okhala ni waarowa okhala mulaponi, waaryaaya vasulu va ethanlelo Awe.

⁴³ Oh, moota yawaka yaary'aya ekhaani, naalikanyihaka ni yeeyo! Moota yawinyu yaaryaaya ekhaani, naalikanyihaka ni yeeyo! Wooniha othunku hiyo ohiweryaka ovilela itthu iya sikhaani!

⁴⁴ Masi okathi ule muulupale wootthuneyaxa, mpakha Owo ohaawa, osuwelaka itthu sothene, mpakha maasi ni Ephome ovalaanyana mw'erutthuni mw'Awe, ni mattoitto maalupale a oviheriwa ntoki Ephome omora vayuuci Vawe. Owo aakhwiye ekhwelo yoowaatta oKetisimani ovikana Owo saakhwiyaawe vamwiikimanyo.

⁴⁵ Owo aari vayookhumelela ya yeela, okathi vakhani paahi ekhotto yuulupale ehinatthi opacerya, nto Owo aahilya Ekomunyawu. Owo aaruuhale awiixutti Awe vamosa, wira olavule itthu ni yaawo.

⁴⁶ Nto ti siiso Owo oniwiirahaaweni nyuwo ni miyo, okathi vakhani paahi ekhotto yuulupale mmakhaleloni ehinatthi opacerya. Ekhotto yuulupale ya yooreera ni yootakhala ehinatthi opacerya mwa hiyo, Muluku onniruuha oKetisimani. Owo onniruuha mwa ekomunyawu, ni Owo onlavula yothene ni hiyo.

⁴⁷ oPhoenix, Arizona, naanikhalaka nikhuru n'araru naakiipelaka, "Kaanitthuna kilavule yeeyo ni Yesu. Kaanitthuna ohinya wira, 'Yesu, Nyuwo mookiphenta okathi ephiro aka yaaryaaya yoophunyeya saana. Okathi waaryaaya wooriipela vahaaweryaaka woona ottaiwene, Nyuwo mookiphenta okathi waaryaaya wooriipela.'" Nto nsipo nlo naamukhaani ninnitthikela nihimya, wira, "Kaatthuna kilavule yeeyo."

⁴⁸ Ni etthu yooreera alopwana ni athiyana a elapo ela, weemela mukwaha woorakama wa mmakhaleloni, ni olavula yeeyo ni Yesu, okhalana ekomunyawu ni Yoowo, moopatthanani. Vano ekhotto enoopacerya, yo wehereriwa ni wootoliwa. "Khula mwaana onrwa wa Muluku, ohaana wehereriwa."

49 Vano, Ekomunyawu kehiyo e, khenvaheriwa wa niwoko athhu anci-ene anuupuwelaaya wira t'eryaaya. Eniixuttihwiwa ni muromolelo mmosa wa ekereja, wira ekomunyawu eniihaniwa “meera ookiserya,” enaaseriwa woopowa. Ekomunyawu khenaaseriwa woopowa. Ekomunyawu khenoovahani woopowa. Hata mwaakhelaka eyo wookhwaani wanyu, wala—wala etthu, eyo kherina-vo etthu ni woopowa wanyu.

50 Iwo wuupuwela. Yesu oohimya, mwa Ehapari yooreera, Owo oohimye wira, “Mwiireke iya mukuupuwelaka Miyo.” Kahi, yaasaka wala ethoonyaka woopowa, masi ti wa wuupuwela muteko woomalihiwa ovarawe mwa nyuwo, ni Erooho Yoowaarya. Iwo wuupuwela.

51 Vano aakhala anci-ene anaakhela Ekomunyawu ahooponwe. Anci-ene yaahimukhuura mwaapwittipwitthi a paasikha nave khupwetaya mothakoni. Nto anci-ene annaakhela Ekomunyawu, olelo, ahinrowa okhalakhala emoonaka Muluku.

52 Masi khamukhanle okhala oowiira mpantte wo woopola Wawe khuhimoona, okhala wira woopowa ti yoovaha ya Muluku. Ni Ekomunyawu wuupuweliwa wa Mukuttho, muulupale woomalela mwa sothene ovaheriwe woopowa. Eri wira owoonihe athhu wira hiyo ninnaamini okhwa, ovithiwa, ni ohihimuwa wa Pwiya Yesu Kristu. Eyo enthoonyerya muteko omalihiwe.

53 Woopowa emaara emosa khuwaamalelihiwe, mwa mukuttho w'epuri, ipwittipwitthi, mwaanyompe oothiyana, mwa Waataana Wa Khalayi, okhala wira ephome ya Waataana Wa Khalayi khiyaawerya ottipiha etampi. Yaawerya paahi okhuneela etampi. Yaathoonya okathi waarowaaya omalelihiwa. Meelo ohiyu nihaana okela mwa yeeyo. Masi eyo yaari ethoonyeryo paahi.

54 Masi okathi Yesu orwiiyaawe, nto Ephome Awe khumwaraxiwa oKalvario, iwo waari omwalana voomalela ni etampi. Eyo yookumiha etampi. Eyo ti enamuna emosa paahi yo woopowa. Khuuvo wiitakanxa ekereja, hata ipaphelo so opatthana, khuuvo mwiirelo wa opatiiso, khiivo Ekomunyawu, wala hat'etthu mwa mwiirelo, wala nlakano nihiiwe na Muluku, ntoko malakano anihimya woopowa; sothene siri mwa wuupuwela wa muteko woomalihiwa!

55 Opatiiso wa mmaasini khoniwoopolani, siiso ntoko athhu imaara sikina sinuupuwel'aya wira onniira. Opatiiso wa mmaasini wuupuwela wa okhwa, ovithiwa, ni ohihimuwa w'Apwiya. Owo khoniwoopolani.

56 Ekomunyawu eri mwa wuupuwela oluwela Wawe wuulupale ni orowa Wawe, ni erutthu Awe yookherakasiwa, ni Ephome Awe yaamwaraxiwe. Kehiyo Ephome y'ekeekhai, kehiyo erutthu y'ekeekhai; masi eri mwa wuupuwela erutthu Awe y'ekeekhai, ni ya Ephome Awe yooreeraxa. Nto hiyo ninkuxa ela ntoko

yoorama, ni Yesu ooniruma wira niireke. Okathi wothene Owo ohikhanlyaaawe, hiyo nihaana waakhela.

⁵⁷ Nookhalana elatarato, yuulupale yooreera muLiivuruni, ya Epaphelo y'aHeperi, kapiitulu 7. Kaatthuna kisome nipuro naamukhaani paahi mwa aHeperi 7, wira niphwanye yoohimya wira erowe ni yeela.

Okhala wira Melikhiseteki ula, mwene a oSalemi, namukuttho a Muluku wirimurimu, yoowo aaronwe okumana n'Abrahamu okathi aahokolowaawe waawiiw'awe mamwene, ni khumureeriha;

Yoowo tiithi Abrahamu aanvahalyaawe ya namuloko...ya sothene; yoopacerya nikhhanle nootaphuleliwa Mwene a exariya, . . . numala Mwene a oSalemi, yoowo okhanle, Mwene a murettele;

⁵⁸ Nwehe, ninthuna nitthikele ottuli, nuupuwele. Paulo va onthhikela amuhimyaka mutthu a Waataana wa Khalayi. Muliivuruni mwa Maphattuwelo, hiyo ninkuxa makhalelo a Abrahamu, okhuma kapiitulu 12 ya Maphattuwelo. Muluku anvahaka Abrahamu natiri, nto mwa Abrahamu wira waamoorwa Osuulu wa xariya. Ni Abrahamu, ntoko sinaaminiwaaya ni anci-ene okhala muYuta, owo khaari. Abrahamu aari Mmalapo, muKhalteya a muttettehe w'oUri. Nto owo khukhala murumeyi a Muluku, kahi mwaha wo wira owo aari oovirikana ni mutthu mukina, masi mwaha w'othanla wa Muluku.

⁵⁹ Nyuwo khamunoopoliwa mwaha wo wira mwa mutthu ooreera murima. Nyuwo munoopoliwa okhala wira Kristu orimoothanlani. Khaavo mutthu onimphavela Muluku; Muluku t'onimphavela mutthu. Yesu ohimnye wira, "Khaavo onwerya orwa wa Miyo ehikhanle wira Atithi Aka anoomuruuha toko." Nto vaakhanle wira naamuwerya weemela okathi vakhani paahi ni osuwela eyuulupale ya etthu yeeyo emosa, wira ti Muluku oothanlalani, ahitthunaka wira mpwetey; masi woovahani okathi, ni owiihanneni, ni oothanlalani wira mukhale murumeyi Awe. Ahe, exeeni yaarowa okhala yooreeraxa ovikana yeeyo? Nyuwo muhithanlale! Yaamukhala yoohiweryaneya mara mutthu omphavela Muluku, maana owo, mwa ephattu, natampii, ni owo khorina hat'etthu mwa yoowo wira envahe otthuna wo omurumeela Muluku.

⁶⁰ Mwaamuwerya orowela ekuluwe ni oleela wira yoovonya? Eyo ekuluwee, ephattu ene. Mwaamuwerya oleela wira elyelo aya ti yoovonyeya? Vekeekhai nnari. Mwa ephattu, eyo ekuluwee. Mwaahaana oleela wira ekhale mwaapwittipwitthi, masi eyo ensiveliwa ntoko ekuluwe.

Ni natampi onsiveliwa ntoko natampi, okhala wira ephattu awe natampii.

61 Nto ela eri va! “Hiyo othene niyariwe mutampini, nipakiwe mwa sootakhala, niruule mulaponi noothaka;” mwa ephattu, mwaana a ohiwelela, oohikhalana Muluku, oohikhalana nrromelo, oviruwa wa Muluku okhalaka mwa hiyo. Nto ni mahala oophenta a Kristu, Muluku, mwa mahala Awe voothuna ni owerya Wawe sothene, ommana murim’anyu ni woovahani okathi woottotopeliwa, ni koorukunxani, ni khoovelelihani mphironi. Mwaakhanle okhoottaka sayi yeeyo? Onrukunxa otthuna wanyu wothe, onimoorukunxani, ni woopacerihani ephiro ekina! Oh, munookhala mulolo, vamaithoni v’olumwenku; masi munooerehiwa, vamaithoni va Muluku. “Ooreeriwa t’ale anvoliwa etala ni ntthona mwaha w’exariya, okhala wira anoovona,” oohimya Pwiy’ahu Yesu Kristu. Muluku, ni mahala Awe oothamaleya!

62 Nwehe, t’ile Muluku iiraly’awe, ele Muluku iihann’awe. Nyuwo khamwaarina hata otthuna wo wiihana. Nyuwo khimwaarowa hata otthuna wiihana, okhala wira mukhalelo anyu waari woovirikana voomalela ni Yeeyo. Masi Muluku, mwaha w’othanla, oowiihanani koorukunxani, ni khuhela ophenta wanyu wa Kristu ni itthu sa Osulu. Naakhanle okhoottaka sayi Yeeyo?

63 Vano Muluku ohooniherya, mwa Abrahamu, etthu Owo aarow’awe owiirela othene. Kahi wira paahi natiri ula ooreerihiwa a ohihimuwa ni Ekumi Ehinimala ovahiwe Abrahamu, masi Osulu awe nuumala owo, Oowiihaniwa, Oothanliwa a Muluku.

64 Ni hiyo ninnoona wira, Abrahamu munlakani mweettaawe mukwaha. Munn’awe, owo aaroomwiihana, Lothi; vekeekhai aari musulu awe, mwaana a munn’awe. Nto waahiphiya okathi wo wehereriwa. Ni Lothi aahitteettheya mwa wehereriwa. Owo elatarato yoolikana ya mulipa-oowaamini a erutthu olelo. Okathi wehereriwa oruulyaaya, wira okhale mmathalani moosoowa, Abrahamu aahinvaha othanla wawe. Nto Lothi aahivenxa maitho awe khoona mathala, mukhatoni, ni yaari oosareya malaxi. Yaari oosareya ipa sooreera nave. Oosareya otthapa. Yaari oosareya etampi nave. Masi Lothi, okhalaka a mukhalelo w’erutthu, aphentaka olumwenku ula wa naanaano ovikana itthu sinrowa orwa, aathanlale okhala mwa sooreera mwa makhalelo ala, ohikhanle okhalana Ekumi ohoolo waya.

65 Abrahamu, ethoonyeryo yoolikana ya mulipa-oowaamini eekeekhai orapihiwe Mphomeni mwa Mwaapwittipwitthi, sootthuna sawe saaheliliwe itthu s’osulu, khwira, “Miyo kinookuxa ephiro n’ale vakhani oothanyiwa a Apwiya. Voohicala sinto entthuneya osuweliwa waka, khula etthu entthuneya, miyo kinookuxa ephiro n’ale vakhani a Apwiya.” Vano owo aathanlale okhala mmuttettheni Muluku aamukhalinhe-awe, mwa okathi wo wehereriwa.

66 Kaatthuna kisuwele ohiy'ula vakhala wira kinlavula n'athu atonko opacerya orowa ni Muluku, nto, okathi wo weheereriwa orwiiyaaya, muthanla otthikela molumwenkuni ni wira itthu sa molumwenkuni wala mukunxe ephiro yoorika ya khalayi yo woopowa?

67 Mwaaairale ntoko Moise, okathi waaryaawe mowehereriwani, okathi waarin'awe nnawu nawe veehiceni va wEjitu? "Masi, owo aahoonu mihakhu sa Kristu okhala muhakhu muulupale ovikana mihakhu sothene sa wEjitu." Owo aahikhuma w'Ejitu, khaacaliwe eweero kavi, osuweliwa sayi. . . Owo aamukunxe Muluku mwa Masu Awe nto khuhiya itthu sa wEjitu, oonaka othanyiwa wa Kristu okhala muhakhu muulupale ovikana mihakhu sa wEjitu.

68 Exeeni eniiraahu mowehereriwani, okathi weheereriwa woorika onrwaaya? Awo yaahimyaka wira okhala wira nyuwo munimwiiwalaanya ni itthu sa molumwenkuni, wira nyuwo mwa namathipelela a etiini, okokheya onnirwa? Ohaana orwa, ni muhaana othanla.

69 Masi kaamuthanla okhala vathi va miyuuttutthi sa Oowerya sothene, miyo kaamuthanla otthara ephiro aka ni, ntoko Yakope, okhalana musawu wa nluku. Kaamuthanla wooniwa ni olumwenku okhala, "ootikiniha," ohikhanle okhalana mihakhu sothene ni iparakha olumwenku ula waakhanlyaaya wupuwelelaka ovaha. Okhala wira, suulupale ti iparakha sa Muluku ovikana mihakhu sothene ni eweero ni eparatha sa olumwenk'ula! Vano nwehe.

70 Vano okathi weheereriwa wuulupale waarwiiyaaya, Lothi aahikela mutampini. Muupuwele, owo aaronwe okhuma omwaako, okhuruwela mapuro oowaateleleya. Owo aahitthikela ottuli, ntoko e. . . Namathoonyerya oolikana a oKristu wa mw'erutthuni olelo, yoowo oniihaniwa, athanlaka otthara ephiro ya ekhweyelo, olili wa maluwa a ekhweyelo, ohikhanle okhala oororomeleya okathi wo weheereriwa. Nto vookiserya owo aahiphwanya mulattu.

71 Ni nyuwo munoophwanya, nave. Mwaathanlakuwa olili wa mapururu wa sookhweya, muupuwele, munoorowa okela mmulattuni, etthu siiso. "Itampi sanyu sinimoophwanyani!" Ni Muluku onimoovarani, nihiku nlo.

72 Nto nihiku nimosa mwene, mamwene a Amalapo a mapuro maalupale ottaiwene, yaahikela khimukuxa Lothi ni an'awe, amwaar'awe ni sothene owo aarinaawe, khutthyawa ni yaawo.

73 Nto nihiku nlo, mpatthani aka oolosowa, mwaahikhale vathi v'Ephome, omwene wa Satana onimooxinttani ni woorihani ottaiwene, mwaahikhale vathi v'Ephome.

74 Nto Abrahamu, ethoonyeryo ya naxariya, owo khaareere okutakutheya mwaha wa musulu awe, nthoonyeryo na muKristu, eekeekhai onehereriwa ni wootoliwa, khukupaliwa.

⁷⁵ Vano, athiyana khiyaareere okhala nnaata ni yeeyo. Mwaara a Lothi aari a s'erutthu, a s'erutthu saana. Owo omphwanyaneya olelo mmathalani iwe, ntoko nripu na maakha, ntoko otakhaliwa, w'ale anvira.

⁷⁶ Saara, muthiyana ooreera, owo aatthuna wira etthu Muluku aamutthunelaawe wira oireke. Owo aanaattittimiha aiy'awe; ntoko, hiyo silavunlyaahu voomalela yeeyo nsana ohiyu. Vano owo aakhala n'Abrahamu, vohicala exeeni yaarwa wala yaarowa. Owo aakhala ni yoowo okhala wira owo aakhala ni natiri. Eyo t'itthu ene.

⁷⁷ Vano okathi Lothi okuxiwaawe, murima wa Abrahamu waahicaliwa ni yoowo. Vano owo aahithukumanya muttitthi w'anakhotto a arumeyi awe, khimurowela munn'awe. Ethoonyeryo yooreera saana. Awo yahaakuxa axoowa aya khwaaxintta mamwene ale, mpakha ahaakhanlyaawe hata mmosa a yaawo aahanle.

⁷⁸ Nto owo ti muthinto wa mulaleyi a Ehapari yooreera, okathi onoon'awe wira etampi yoovara ekerej'awe khwaakuxa atthu. Owo onkuxa Ehapari yooreera ya khalayi yooreerihiwa, Xoowa a Erooho, nto owo onoothikila n'uthikila, mpakha owo okumiha etampi mukereja mw'awe, vakhalaru wira owo murumeyi eekeekhai a Muluku. Owo onookumiha ethiru yothene, okwakwaruwa mwaano, waapa. Owo onookumiha itthu sothene ni mikhalelo sa s'erutthu sa molumwenkuni siivoloihale mukereja, owo akhalaru murumeyi eekeekhai a Muluku. Owo onkuxa Masu, ni othikila okhuma epantte emosa mpakha ekina, mpakha owo othikila itthu sothene.

⁷⁹ Vano nto vankuxalyaawe Lothi, munn'awe ootthikela ottuli, ni anamwane, ni owo aahokoloxeryaka owaataanihiwa, nwehe, Mwene ola muulupale aahirwa okhuma oYerusalemu, khukumana ni yoowo. Melikhiseteki! Muthinto xeeni wa Mutthu aari uwo? Owo iihaniwa "Mwene a oSalemi." Yeeyo, khula musomi onsuwelaawe wira *Salemi* aari "Yerusalemu." Aaihaniwa Salemi ohinatthi wiihaniwa Yerusalemu. Aari pani Mulopwan'ola aakumananne awe, uupuwenle wira owo aahithara nivalo nooloka? Aari Pani Mutth'ula aavilenle ni yoowo? Nkanweheni Ole Owo aaryaawe.

...Owo ti *Mwene a oYerusalemu*, owo nave-tho ti *Mwene a Murettele*;

Versiikulu yaneeraru:

Khaarina tiithi awe, hata maam'awe, khaarina nloko nawe, khaarina opacerya wa mahiku, wala oohikhalana emalelo y'ekumi; . . .

Aari pani Mukhulupale ola muulupale aakumananne awe vaamanlyaaya ekhotto? Nrowe nikhunle mwa Maphattuwelo, eversiikulu 14. . . kapiitulu 14 versiikulu 18.

Nto Melikhiseteki mwene a oSalemi aahiruwa mukatthe ni eviinyu: . . .

. . . aahireeriha, khwira, Attottopeliwe . . . Muluku a wiririmu, mwaneene a erimu ni elapo ya vathi: ni areerihiwe Abrahamu yoowo okhanle murumeyi Awe.

⁸⁰ Vaamanlyaaya ekhotto, vaaphwanyiswa oxintta, vaamanlyaaya wiiriwa elivelo, Melikhiseteki aahikumana ni Abrahamu mapuro oowaataleleya khuruuha mukatthe ni eviinyu, khunvaha yoowo.

Nto Aani? Khaari-tho mukina woohikhala Ole aakumanne n'Abrahamu voophiyaka mwaakha mmosa ohoolo waya, khukilaathi mukhitte mwa mwiri khulavula ni yoowo.

⁸¹ Nto Melikhiseteki yoola ohimye wira, "Miyo nkinrowa-tho owurya muhokorokho wa eviteera mpakha kiwurye vasya ni nyuwo, Momweneni mwa Atithi Aka, nuumala ekhotto, waphwanyiwaru oxintta." Vano ninoowurya-tho yeeyo Momweneni mw'Awe, yawaniwuru ekhotto yookiserya. Okathi xoowa ookiserya oniivaawe yootakhala yookiserya ya molumwenkuni, ni Ekereja yuulupale ya Muluku mukumi enxinttaaya, Kristu onrowa okumana ni yaawo osulu, ni mukatthe ni eviinyu, emaara ekina, ni waakhela Ekomunyawu, ni wa Ohimala Ohoolo w'Atithi.

⁸² Oh, nawetta oowoceya, ohiy'ula, mutthikele Empa y'Atithi. Mukhume oSotoma! Muhaataanihiwa ni Ephome. Nto ohiy'ula woovuwa wa muupuxeryo, okathi Melikhiseteki ahu muulupale, Yoowo ahaarina epacerelo ya mahiku wala emalelo y'ekumi, masi ti Mwene ni Mukhulupale voohimala-tho.

⁸³ Erooho Yoowaarya va ohiy'ula eniweepesa ale ahooponwe, vano vakhala wira muri oohikhalana Kristu ohiy'ula. Nto ekhotto yamala vale, mwaatthunaka okumana ni Yoowo ni murettele ni waakhela Ekomunyawu ni Yoowo, ni nyuwo moohimya wira nyuwo munnimpenta Yoowo, ni wiivalaaniha itthu sa molumwenkuni. Mukuxe Ehapari yooreera ya khalayi yoolipa ni enamuna ya khalayi yoolipa ni nwurye ekahi ya owaawa ya olupatthiwa wa molumwenkuni, ni nwuryaka mirette soowaawa sa olupatthiwa wa molumwenkuni; ninvaahiwaahu ni Bibilia wira ninoorowa owurya iviinyu soosiva sa Wirimu nihiku nlo, okathi onkuman'ahu ni Yoowo ni murettele epantte ekina eriyari ya Wirimu ni elapo ya vathi, okathi Owo onrwaawe wira okawe Ekomunyawu. [Nipuro vahiitthu mufiitani—Mol.]

⁸⁴ Mirima sahu sitthokelele yeela, "Miyo kinoowurya vasya ni nyuwo, Momweneni mw'Atithi Aka." Vakhala wira Owo ohaana orwa Paasikha mukina ohinatthi orwa, vaakhanle wira mwaamukhwa Paasikha mukina ohinatthi orwa, eyo khenrowa okhoottiha yookhumelela eyo yuulupale. Maana miyo kinihimya, ni Masu a Apwiya, wira ale anrupa mwa Kristu anoohihimuwa toko. Vano hiyo ninrowa ohala nryeene akumi ninrowa

okuxiwa vamosa ni yaawo, vamosa, osulu, wira nakumane n'Apwiya. Nto Melikhiseteki muulupale a Wirimu, Mwene a kahi Yerusalemu a mw'erutthuni, masi Mwene a oYerusalemu wa Wirimu, oYerusalemu wa Naanaano, onookumana ni hiyo, ni ninookaweliwa-tho eviinyu ni mukatthe.

⁸⁵ Ohiy'ula nihanle okuxa iyooniheryo ya yeela. Nihanle wira mpakha nimphwanye Owo arwaaka-tho. Niphwanyawe oororomeleya nuuramihaka muru okathi vakhani, wa nuulumo na mavekelo.

⁸⁶ Atthu othene omaala ntoko sinweryaney'aya, okathi ula woottittimiheyaxa, woowaarya. Moota ery'aya yookhweya ohiya itthu iya othereneya! Bibilia ohimye wira, "Nihihye itthu iyo othereneya, ni onyoonyeriwa woopowa iwo wuulupale." Ti yookhweyaxa oliyala. Hiyo khaninrwa okereja wira nooniwe. Hiyo khaninrwa wiiwa wiipiwa wooreera wala mutthaka wooreera. Hiyo ninoorwa okereja wira nikokhorele, wira nimukokhorele Muluku.

⁸⁷ Ni khula mmosa a hiyo, mutthu ahu onookhwa ookhalana munepa orina okumana ni Yoowo nihiku nlo. Ni naattamelaka nihiku nla nuulupale na okhomeliwa, mwa wuupuwela wo orowa Wawe, ohiy'ula, mwaahikhale muKristu, muhinatoko omukupali Kristu mmakhaleloni mwanu ntoko Moopoli, mookupalihiwa voophiyerya mwaha w'olaleeriwa wa Masu, ni Erooho Yoowaarya emphwanyaneyava khiviru ni nyuwo wira ehimye, "Mootheka. Vano murukunuwe mpacerye ephiro ekina"? Mwaamuhimya yeeyo nvenxaka ntata nanyu, mwiiraka, "Munna Branham mukivekelele. Vano kinniveka mavekelo anyu wira Muluku akimorele ikharari"? [Nipuro vahiitthu mufiitani—Mol.] Munnitthuna ovenxa ntata nilipelelaka? Muluku ooreeriheni, mulopwana. Mutthu mukina tho?

Muluku ooreeriheni. Muluku ooreeriheni, mulopwana. Muluku ooreeriheni, mwaamukhaani. Muluku ooreeriheni. Mutthu aamu . . . ? Muluku ooreeriheni, muhano.

⁸⁸ Nyuwo muniira, "Munna Branham eyo ennihimya etthu ovenxa ntata naka?" Evirikanelo paahi ya okhwa ni Ekumi. Exeeni ekhanle yuulupalexaxa ovikana Ekumi? Munnimphenta . . . nyuwo munweha ephattu. Munniphenta; munninyokha orowa ottaiwene wa yeeyo.

⁸⁹ Ekhopela ele iwe y'ephiro, nno, okathi mwaara a muhima aka aakhwaawe, voosiisu uwo miyaakha sinci-ene sivinre, okathi Ruth mwaamukhaani oohaawa aavenxalyaawe muru awe, aahikhala mwaapalame piixiku ooxeerya ekuuku aakotenle vamwirini va serexa, ni aatthuna woona-tho emaara ekina . . . Moota owo aaphentaawe ephattu. Masi nihiku nimosi Yesu arwa vale, owo onoowiiwa axipalame a Woohimalani yiiipaka. Maluwa oohikhwa anrowa wunnuwaka. Khenrowa okhala hata eretta, mixankiho, wala okhwa, okhala wira owo ookhalaha

murettele awe ni Muluku ni aahimukupali Kristu muulupale Yoowo omukhwenle. Ni nrromel'ola wooreerihwa Yoowo ohikhanle ovonyaka, Masu ooreerihwa a Muluku Yoowo ohikhanle woothaka, ohaalaiherya Ekumi Ehinimala ale yaaminni. Mwaavenxaka ntata nanyu, eyo enooniherya wira erooho emosa muhina mwa nyuwo ehiira ethanlelo. Muluku ooreeriheni, muhano.

⁹⁰ Etthu emosa mwa nyuwo, e—erooho...Mwa ephattu miyoono sanyu sipakiwe wira sikhuruweleke vathi, vano mwaavenxaka ntata nanyu muniwanana ikano sene sa elemelelo. Ehaana okhala ya erimu. Ti—ti yoonvirikanya siyensiya... yoonvirikanya itthu sothene sa siyensiya nyuwo ohonona ikano sa elemelelo. Khivanweryaneya wiiriwa vooikhkala wira yookhala etthu ya erimu. Miyoono sanyu saamutthikela sikhuruwelaka vathi. Masi vakhala wira, mmurimani mwanyu, nyuwo munnimwaamini wahala a Ehapari yoooreera ni muhiira ethanlelo anyu ohiy'ula, wira nyuwo moomalihana ni etampi, ni mwa waattamela nno wooreera oKalvario okathi meelo, iwoora tthaaru, mwa wupuwela, ninvirihahu okathi Yesu okhwenlyaawe woopowa wanyu...Ni nyuwo munuupuwela voophiyerya yeeyo ni Erooho Yoowaarya ehoorwa khumana murim'anyu vano nyuwo mukupali... .

⁹¹ Nyuwo paahi... etthu mmurimani mwanyu eniira, “Nvenxe ntata.” Eyo eniwooniherya atthu, ni Muluku, wira nyuwo munnaamini ni munnikupali. Muluku ooreeriheni, nyuwo anamwane othene: araru wala axexe a yaawo va waltaari, aximiravo n'axiruusi oophiyaka miyaakha mithanu na miraru, muloko, awo othene aavenxa matata aya emaara emosaru. Yesu ohimnye wira, “Mwaahiye anamwane ekirweeleke miyo. Muhaakhoothiheryeke, maana Omwene ti wawaya.” Ookhala mukina nihinatthi ovekela?

⁹² Muluku ooreeriheni, muhano. Eyo ti y'ekeekhai...Nyuwo pooti mwiirale-ene itthu sinci-ene, muhano, mwa makhalelo. Eyo yaari ekeekhai; miyo kookupali wira nyuwo mwa mu—muthiyana a nneema. Ni muupuwele, khimwaakhanle ovenxaka ntata nanyu, munna oophentiwa, vahikhanle wira etthu muhina mwa nyuwo, etthu emosa muhina mwanyu erimwiira, “Mwiire yeeyo.” Pooti okhala ntoko y'elolo vakhani vano wa muupuwelo wa erutthu, masi munna, nihiku nlo okathi tothoro onkhumaawe vamukhora ni wira, “Yoomala.” Okathi owo onkhumaawe vanikarakasani vale ni opurula erutthu anyu iyo yaamukhaani, ephome eyeeheryaka ni murim'anyu ovelavelaka, “Khivantthuneya orukuneya n'awo; awo aarowa.” Oh, wulu. Ni voovelavela muhina mwa ewoora emosa mutthunaka orukunxa murima, ni Muluku khwira, “Muhasarani mwanyu Miyo kinwerya otheya paahi.” Masi muryeene mmuupuweloni mwanyu wooloka, okathi nyuwo... [Nipuro vahiitthu mufiitani—Mol.]

⁹³ Tithi, niruuhaka mutthak'ola woomalihani, ni woohephani w'atthu oophiyaka muloko n'athanu, evenxaka matat'aya, ale ankhalka anatampi ekumi aya yothene. Nto vano, ni mahala, Nyuwo moolavula n'awo, khwaarukunxa khaawehiwa oKalvario, ni yiwaka Masu awo okhuma muyanoni mwa Mwaana a Muluku, "Tithi, mwaalevelele, awo khayaasuwela etthu yiiraaya." Masi ohiy'ula awo ahaakhela Ehapari yooreera. Hiyo ninnimwiiwa Owo wira, mahiku vakhani ehinatthi yeela, "Ole oniiwa Masu Aka, ni onimwaamini Ole okirumme, ookhalana Ekumi ehinimala; ni khonrowa olamuliwa, masi oovira mookhwaani khuphwanya Ekumi." [Nipuro vahiitthu mufiitani—Mol.]

⁹⁴ Hiyo ninnaaruha awo wa Nyuwo ohiy'ula, Pwiya, ntoko an'Inyu. Iparakha Sanyu Sihinimala sikhale mwa yaawo, mwa Nsina na Kristu ninnivekela. Awo erwe Ttiminku voosiisu, ekuxaka ikuwo saya, yiraka, "Kinthuna ohimya v'atthuni wa olumwenku ula, wira miyo ka mulipa-oowaamini. Miyo vano kinnitthuna opatsiwa ni Nsina na Pwiya Yesu Kristu; kinvekelaka Yoowo wira akisarihe Erooho Yoowaarya, ni akikhapelele mwa makhalelo."

⁹⁵ Mwaareerihe aximwali ala, aximiravo ala, atokweene, axinamwane akhaani, ni othene, mwaakhapelele, Tithi, awo t'Awinyu. Ni mwa mihokorokho sa mutthak'ola ohiy'ula, miyo kinnaaruha wa Nyuwo, ntoko mikhalelo. Ni awo ari mmatatani mw'Anyu, ntoko soovaha sa ophenta wa Muluku, Tithi. Miyo kinvekelaka wira Nyuwo mwaakhapelele mwa makhalelo. Mwa Nsina na Yesu miyo kinnivekela. Amen...?...

⁹⁶ Hiyo ninnitthapa vanci-ene okhala ni nyuwo va ohiy'ula, ni ninnitteeliwa murima nyuwo orwa. Nto meelo ohiyu, Mutthaka ahu ti, meelo ohiyu, nirowaka: *Olokihiwa Voomalela Wa Mulipa-oowaamini*. Nto vano murwe, mmuruuhe mutthu ni nyuwo, vakhala wira ekerej'anyu kherina miteko s'okokhorela.

⁹⁷ Nto vano ninrowa okhalana Ekomunyawu. Khino amosa-amosa a nyuwo...Kooxeleliwa vakhani paahi, minuutu vakhani, ni ninrowa waalaiha ale arina orwa.

⁹⁸ Nto ale antthuna ohala yaakhelaka Ekomunyawu ni Orapiha inawu ni hiyo, hiyo ninnaamini voomalela opaka khula nlakano Yesu onihienry'awe wira nipakeke. Vano Owo arwa vale mwa nloka naka, ni akitthuniherya okhala muupuwelo aka wooloka ni okhalaha ophenta Wawe mmurimani mwaka, kinaamwiilipiha yooreera waka wira kiire khula nimoso wa yaawo, ni kiphwanyawe ooromeleya voopuroni. Muluku ooreeriheni vano.



EKOMUNYAWU EMK57-0418

(The Communion)

ETTHARANELO MIHAKALALIHO SA PAASIKHA

Mutthak'ola wa Munna William Marrion Branham, opaceryawene olaleeriwe ni Enkelesi Namaxexe ohiyu, mahiku yeetaka 18 mweeri wa Abril, 1957, oBranham Tabernacle oJeffersonville, Indiana, wAmerika okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org